



Sesida dals

22 da zercladur 2021

Communitgà ils

30 da zercladur 2021

Protocol nr.

619/2021

Incumbensa Rutishauser

concernent il pajament d'ina premia da corona al persunal da sanadad dal Grischun

Resposta da la Regenza

Per la Regenza grischuna na datti nagins dubis ch'il persunal dals ospitals, da las chasas da persunas attempadas e da tgira sco er da la Spitex ha furnì durant la pandemia ina gronda prestaziun che merita engraziament. Numerusas instituziuns èn sa mussadas engraziaivlas envers lur collavuraturas e collavuratur ed han pajà indemnizaziuns supplementaras. La Regenza beneventa explicitamain quest pass, cunquai che las instituziuns correspudentas admettan uschia er in segn da stima al persunal. En vista a la mancanza creschenta da persunas spezialisadas è quai da gronda impurtanza.

In'enquista da la Federaziun grischuna "Chasas ed ospitals" davart las premias ha purtà il suandant resultat (42 instituziuns èn s'exprimidas):

- Ina maioritad da las commembras consultadas beneventa ina premia da corona finanziada tras il chantun. Circa in terz giavischa ultra da quai che betg mo il persunal da sanadad, mabain tut las collavuraturas ed ils collavuratur dal sector da sanadad survegnian ina tala premia.
- Ina minoritad vuless ch'ils daners dal chantun vegnian pajads als manaschis, per che quels possian reparter las premias "en moda gista". Tut ils manaschis duain survegnir daners, er manaschis che han gia pajà premias a las collavuraturas ed als collavuratur.
- Ina "prescripziun da premias" dal chantun als manaschis, senza ch'ils meds finansials vegnissan mess a disposiziun, vegn refusada da bunamain tut ils interrogads. Sche insumma, duai mintga manaschi pudair decider sez, sch'el vul pagar ina premia u betg.
- 17 da las 42 commembras ch'èn sa participadas a l'enquista han gia pajà premias a lur collavuraturas e collavuratur. Las autras betg.

Las organisaziuns da la Spitex èn s'exprimidas sco suonda en chausa (16 respostas):

- Da las organisaziuns da la Spitex han 8 gia pajà ina premia en x ina furma, 8 n'han betg fatg quai.
- 7 manaschis èn cunter ina premia da corona finanziada tras il chantun (principalmain perquai che autras branschas èn tuttavia tangadas anc pli fitg e perquai ch'il persunal da talas sto per part temair per sia piazza u ha schizunt pers la piazza), 4 manaschis èn persuerter, 5 n'han betg ina clera opiniun.

La Regenza ha examinà detagliadamain la dumonda d'ina premia da corona per il persunal da sanadad. La regulaziun da las cundiziuns da lavur, ed uschia er da las premias, tutga dentant da princip al champ da cumpetenzza da las partidas dals contracts da lavur. Las differentas instituziuns da sanadad ed il persunal da sanadad èn

pertutgads en moda fitg differenta. Envers in'eventuala premia da corona datti differentas aspectativas. En quest connex exista il privel che summas pli pitschnas pudessan vegnir consideradas sco spretsch empè sco stima, entant che summas d'ina autezza da plirs millis francs per persuna n'èn strusch giustifitgables en vista ad auters secturs economics. Quai er resguardond il fatg ch'il persunal da sanadad è fitg dumandà en ils conturns actuals e ch'igl è chausa da las instituziuns da porscher cundiziuns d'engaschament correspudentamain attractivas.

Plinavant stoi vegnir resguardà ch'il chantun Grischun n'è (cuntrari er ad auters chantuns) betg purtader da las instituziuns dal sector da sanadad. Er sut quest aspect èsi pia chausa da las instituziuns e dals purtaders respectivs d'indemnizar prestaziuns supplementaras dal persunal. Sco gia explitgà è quai er gia vegnì fatg per part. Ina calculaziun approximativa da l'Uffizi da sanadad ha mussà ch'il pajament d'ina premia da corona al persunal da sanadad grischun stuess vegnir quantifitgà tut en tut cun circa 6,2 milliuns francs, quai che corresponda circa ad 1 pertschient dals custs da persunal. La Regenza è da l'avis che las instituziuns èn ablas da purtar ed er da supportar sezzas quest import. Sche questa incumbensa vegniss acceptada, stuess la Regenza pagar per l'onn 2022 in'unica giada la part chantunala (var 4,2 milliuns francs) per questa indemnizaziun supplementara (augment da las contribuziuns als ospitals per prestaziuns d'utilitad publica per 4 milliuns francs, augment dals custs renconuschids da la tgira en las chasas da tgira per 2 raps per minuta ed augment dals custs renconuschids per mintga ura prestada en la Spitex dad 80 raps per ura). La repartiziun commensurada fiss chausa da las instituziuns. Quels manaschis che han gia pajà ina premia pudessan scuntrar quella correspudentamain.

La Regenza vegn a s'engaschar er vinavant, per che las professiuns dal sector da sanadad restian attractivas là, nua ch'il chantun po prender influenza (p.ex. purschida da plazzas da scolaziun, salarisaziun da la scolaziun, incaricas da prestaziun a las instituziuns, contribuziuns per l'instrucziun e per la perscrutaziun, contribuziuns per ils servetschs da salvament, contribuziuns per prestaziuns d'utilitad publica, sustegn da campagnas e.u.v.).

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Il chancelier:

Dr. Mario Cavigelli

Daniel Spadin